

Naalakkersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaat

Naalakkersuinikkut ingerlatsisut partiit naatsorsuutaat

§ 1. Partiit, Folketingimut imaluunniit Inatsisartunut kingullermik qinersinermi Kalaallit Nunaanni qinigassanngortitsisimasut partiip nuna tamakkerlugu kattuffiata isertitai aningaasartuutaalu pillugit ukiut tamaasa ukiumoortumik naatsorsuutini saqqummiussisassapput. Isertitat assigiinngitsut makku pillugit paasissutissanik ukiumoortumik naatsorsuutit imaqassapput:

- 1) Pisortaniit partiimut tapiissutit.
- 2) Ilaasortat akiliutaannit isertitat.
- 3) Aammattaarlu inuinnarnit akileeqataassutit.
- 4) Nunani tamalaani suleqatigiiffinit, inuinnaat ataatsimoorussamik peqatigiiffinit, suliatigut kattuffinit, inuussutissarsiortut suleqatigiiffinit, inuussutissarsiorluni suliffeqarfinnit, aningaasaateqarfinniit peqatigiiffinniillu akileeqataassutit.
- 5) Ernianit isertitat.

Imm. 2. Partii ukiumi naatsorsuiffimmi akiliuteqartumit ataatsimiit akileeqataassummik imaluunniit akileeqataassutini arlalinnik katillugit 10.000 kr.-inik amerlanerusunik pissarsisimappat akiliisup aqqa najugaalu ukiumoortumik naatsorsuutinit takuneqarsinnaassaaq. Kinaassutsiminnik nalunaaruteqaratik akiliuteqartunit akileeqataassutit tamarmiusut annertussusaat pillugu paasissutissanik aamma 10.000 kr.-it sinnerlugit kinaassutsiminik nalunaaruteqanngitsumit ataasiakkaanit akileeqataassutit annertussusaat pillugit paasissutissanik aamma ukiumoortumik naatsorsuutit imaqassapput.

Imm. 3. Ukiumoortumik naatsorsuutit oqimaaqatigiissitsineq aamma nammineq aningaasaatit pillugit paasissutissanik imaqassapput.

Imm. 4. Ukiumoortumik naatsorsuutit ilassutitut nalunaarsukkatut partiip nuna tamakkerlugu kattuffiata § 4 malillugu pissarsiarisimasaanik paasissutissanik imaqassapput.

§ 2. Ukiumoortumik naatsorsuutit partiip aqutsisuinit atsiorneqassapput aamma ukiumoortumik naatsorsuutini allanneqarsimasunik partii allanik isertitaqarsimanngineranik aningaasartuuteqarsimanngeranilluunniik nalunaarummik imaqassallutik.

§ 3. Ukiup naatsorsuiffiusup naaneraniit kingusinnerpaamik qaammatit arfinillit qaangiutsinnagit partii ukiumoortumik naatsorsuutini Inatsisartunut nassiussissaaq. Ukiumoortumik naatsorsuutit Inatsisartut Siulittaasooqarfiata tamanut saqqummiutissavai.

Immikkoortortaqrfiit aamma inuusuttut immikkoortortaqrfiit paasissutissiisussaaititaanerat

§ 4. § 1, imm. 1-mi ilaasup partiip immikkoortortaqrfa imaluunniit inuusuttunut immikkoortortaqrfa ukiumi ilivitsumi § 1, imm. 1, nr. 3-4-mi taaneqartunik akileeqataassutininik, katillugit 40.000 kr.-inik amerlanerusunik tigusaqarsimappat, immikkoortortaqrfik ukiup ilivitsup naaneraniit kingusinnerpaamik qaammatit sisamat qaangiutsinnagit partiip nuna tamakkerlugu kattuffianut makku pillugit paasissutissanik nassiussissaaq:

- 1) Akileeqataassutit tamarmiullutik annertussusaat.
- 2) Akileeqataassutisip ataatsip annertussusaa, akileeqataasup aqqa najugaalu allallugit, immikkoortortaqrfik akileeqataasumit ataatsimiit akileeqataassummik imaluunniit akileeqataassutininik arlalinnik katillugit 10.000 kr.-inik amerlanerusunik pissarsisimappat.
- 3) Kinaassutsiminnik nalunaaruteqanngitsunit akileeqataassutit tamarmiusut annertussusaat.
- 4) Kinaassutsiminnik nalunaaruteqanngitsunit ataasiakkaanit tamanit ataasiarluni akileeqataassutit 10.000 kr.-inik amerlanerusut annertussusaat.

Pineqaatissiinerit, atulersinnera il.il.

§ 5. Akiliisitsisoqarsinnaavoq:

- 1) § 2, § 3, imm. 1 aamma § 4 unioqqutinneqarpata.
- 2) §§ 1 aamma 4 malillugit paasissutissanik eqqunngitsunik amigaateqartunilluunniit tunniussisoqarpata.
- 3) § 2 malillugu eqqunngitsumik nalunaaruteqartoqarpata.

Imm.2. Inatsisartut inatsisaat akiliisitsinissamut tunngavissiippat Kalaallit Nunaanni pinerluttulerinermik inatsimmi inatsisitigut pisussaaitaasup pisinnaatitaasullu akisussaaffia pillugu maleruagassat malillugit partiip kattuffia akiliisinneqarsinnaavoq.

§ 6. Inatsisartut inatsisaat ulloq 1. januar 2013-mi atulersinneqarpoq.

Imm. 2. § 1 malillugu naatsorsuutit 2013-mut ukiumut naatsorsuiffik pillugu siullermeertumik nassiunneqassapput.

Namminersorlutik Oqartussat, ulloq 22. november 2011

Kuupik Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut